

## **Bishita di Prins Albert na Aruba y Corsou**



Ken di nos a yega di tende cu Su Excelencia Albert Alexander Louis Pierre Grimalli, miho conoci como Prins Albert di Monaco a bishita Aruba y Corsou den aña 2004? Prins Albert a nace dia 14 di maart 1958 y ta e prins di Monaco, hefe di e Casa Real di Grimaldi. E ta e yiu homber di Prins Rainier III y Princesa Grace, anteriormente Grace Kelly, e artista Mericano. Prins Albert tin dos ruman muhe, esta Caroline, Princes di Hanover y Princes Stephanie. Na juli 2011, Prins Albert a casa cu Charlene Wittstock.

Prins Albert II ta un di e famianan real di mas rico na mundo, cu bienes balora na mas cu un bion dollar, cu ta inclui tereno na Monaco y Francia. Prins Albert ta doño di e accionnan

den e *Societ  des Bains de Mer de Monaco*, cu ta opera casino di Monaco y otro propiedadnan entretenimento den e principado.

Na fin di october y cuminsamento di november 2004, Su Excelencia Prins Albert a bishita Aruba y Corsou pa dos dia. E tabata aki pa su trabounan como representante di Fundacion Laureus; un fundacion cu ta duna sosten na hobennan cu tin problema como resultado di pobresa, violencia, droga, guerra of discriminacion y ta promove deporte pa logra cambionan social.

Pa loke ta trata e evento mas grandi y hopi exitoso di aña na Aruba, su alteza real Prins di Monaco, su alteza Prins Pieter Christiaan di Hulanda, Aruba su Prome Minister, Sr. Nelson O. Oduber y otro dignatarionan hunto cu 200 invitado, tabata presente pa e apertura oficial di The Links na Divi Aruba, Aruba su cancha nobo di golf, riba diabierna 29 di october 2004. E festividadnan a cuminsa e dia ey cu un fiesta di cocktail na piscina di Divi Village Golf and Beach Resort; e compleho unda e cancha di golf ta situa. Alex Nieuwmeyer, director di operacion pa Divi Resorts Aruba, Prome Minister Oduber y Aruba su Minister di Turismo y Transportacion Sr. Edison Briesen, a yama e huespednan un bonbini y inmediatamente despues Sr. Nieuwmeyer a presenta un check na balor di U.S.\$50,000.00 na e Laureus Sport For Good Foundation.



E donacion tabata den conhunto cu e celebracion di e apertura di The Links na Divi Aruba y e fundacion di Aruba Chapter y e Fundacion Laureus hunto cu varios negoshi local Arubiano, incluyendo Caribbean Mercantile Bank N.V., de Palm Tours, Diamonds International, Hertz/Ultimate Automobiles, ATCO, Bon Bini Cargo, Arubaanse Wegenbouw Maatschappij y Caribbean Overseas.

Despues di e presentacion, su alteza real Prins Albert di Monaco oficialmente a habri The Links na Divi Aruba door di e prome "tee off ceremony". Esaki a wordo sigui pa champagne, hors d'oeuvres y un show di vuurwerk deslumbrante ofreci pa The Links na Divi Aruba.

Riba diasabra, 30 di october, a tene e Torneo Beneficio di Golf di Laureus Sport for Good Foundation. E torneo, un Four Man Scramble di 18-hole, cu a wordo atendi pa su alteza real Prins Pieter Christiaan, a wordo sigui pa un almuerzo pa tur atleta na e restaurant Red Parrot na Divi Aruba All Inclusive, un afiliado di Divi Resorts. Tur fondo genera den e torneo, a bay pa Laureus Foundation.

E capitulo Arubiano di e Laureus Foundation a wordo funda pa Prins Pieter Christiaans van Oranje Nassau den su funcion como presidente di e Capitulo di Hulanda y Sr. Nick van Kouwenhoven, Presidente di Laureus Foundation pa Benelux. E fondo otorga na The Links na Divi Aruba lo keda na Aruba pa uza como donacion deportivo. E Laureus Sport for Good Foundation, un organisacion cu ta uza sport como un herment pa cambianan social, actualmente tin capitulonan den bintiseis pais rond mundo.



For di Sr. Luis Tromp, Presidente incansabel di Club Aruba Jrs. pa 21 aña largo, mi a ricibi e siguiente informacion di e bishita di Prins Albert di Monaco na nan club. Na aña 2004, nan tabata riba un proyecto miyonario di renobacion di e club. Prome parti tabata pa pone un dak pa e cancha di basketball y despues traha riba renobacion di e club y e veld di softball.

Durante bishita di Prins Albert di Monaco, su deseo tabata pa participa den un di su deportenan favorito, esta basketball. Su bishita na Aruba tabata net cu Club Aruba

Juniors a caba di renoba e cancha di basketball, di modo cu e cancha aki a keda escogi pa Prins Albert bin hunga basketball. Presidente Luis Tromp y su miembronan a dicidi di organisa un wega entre Aruba Juniors y Estrella pa asina duna e prins oportunidad pa hunga, maske ta un parti di e wega. Esaki no a cristalisa manera planea, pero su altezanan real a shoot bala hunto cu e hobennan atleta, pa despues sinta gosa di e wega.



Su siguiente año, Club Aruba Juniors a ricibi un donacion di Fundacion Laureus pa asina e club por sigui funciona.

Manera splica anteriormente Prins Albert su fundacion Laureus ta duna sosten na hobennan cu tin problema como resultado di probresa, violencia, droga, guerra of discriminacion, y e ta promove deporte pa logra cambianan social.

Prins Albert, un fanatico deportivo grandi y un miembro IDC, a bishita e Amstel Bright Race na Corsou. E evento ciclismo aki a tuma luga pa di tres biaha e año aki y tabata completamente dedica na e despedida di Campion Olympico, Leontien Zijlaard van Moorsel. Prins Albert a otorga e prome premio di e careda na ganado Oscar Freire, sperando cu esaki lo por entusiasma e ciclistanan pa e metanan di e Fundacion Laureus.

Fuera di su actividadnan pa e Fundacion Laureus, Prins Albert a logra mira algun otro proyecto. Su bishita na Curaçao Dolphin Therapy Center (CDTC) tabata hopi interesante. Muchanan, sea mentalmente of fisicamente limita, ta wordo yuda pa medio di terapia cu dolfijn. E tratamiento specifico aki tin un efecto hopi positivo riba e muchanan. E dolfijn riba su mes no ta cura, pero e comunicacion cu e dolfijn den combinacion cu e yudansa di e entrenadonan specialisa, ta entusiasma e mucha di tal forma cu nan ta haya un empuhe sin limite. Un bishita na e centro di dolfijn no por ta completo sin cu bo mes landa cu e dolfijnnan y pa e motibo aki e prins a participa y landa cu e dolfijnnan. E tabata compañia pa Prins Pieter Christiaan van Oranje Nassau. Prins Albert tabata entusiasma cu e terapia y su experiencia cu e dolfijnnan. (Potret di Tim Diaz di Aruba ta sunchi un di e dolfijnnan.)



(Danki na Luis Tromp pa su contribucion, Yolanda Croes como Corector y websitenan: Curacao Dolphin Therapy Center y [www.prweb.com](http://www.prweb.com))





**FIN**